

Skupština Kantona Sarajevo

Admela Hodžić, zastupnica u Skupštini Kantona Sarajevo

Sarajevo, 29.12.2025. godine

Bosna i Hercegovina

Federacija Bosne i Hercegovine

Kanton Sarajevo

Skupština Kantona Sarajevo

N/r predsjedavajućeg

Vlada Kantona Sarajevo

N/r premijera

Kolegij Skupštine Kantona Sarajevo

ZASTUPNIČKA INICIJATIVA

Na osnovu čl. 106. i 213. stav (1) Poslovnika Skupštine Kantona Sarajevo („Službene novine Kantona Sarajevo“, broj: 41/12-Drugi novi prečišćeni tekst, 15/13, 47/13, 47/15, 48/16, 9/20, 14/20, 16/22, 17/22-Ispravka i 47/24) podnosim inicijativu Vladi Kantona Sarajevo i nadležnim resornim ministarstvima Kantona Sarajevo da se poduzmu sve potrebne mjere i radnje za Projekat “Vodotok Crna Rijeka” kojim bi se omogućilo rješavanje pravne regulative, uključujući proglašenje javnog interesa od strane Skupštine Kantona Sarajevo, kao i uvrštavanje ovog projekta u Program javnih investicija Kantona Sarajevo, kojim bi se postigli pravni uslovi u 2026. godini da se projekat planira u okviru programa utroška.

Obrazloženje:

Na osnovu člana 163. Poslovnika Skupštine Kantona Sarajevo podnijela sam sljedeći amandman na Prijedlog Budžeta Kantona Sarajevo za 2026. godinu.

Ministarstvu komunalne privrede, infrastrukture, prostornog uređenja, gradjenja i zaštite okoliša Kantona Sarajevo da se umanje sredstva sa ekonomskog koda:

613900 YAK008 056F Finansiranje troškova iz segmenta zajedničke i individualne komunalne potrošnje umanjuje se za 1.000.000,00 KM, te da se otvori nova budžetska pozicija:

821 500 NOV - Izrada glavnog projekta za "Vodotok Crna Rijeka" u iznosu od 1.000.000,00 KM.

Stav predlagača:

Amandman se ne prihvata uz sljedeće obrazloženje:

Preduslov za uvrštavanje ove pozicije je rješavanje pravne regulative uključujući proglašenje javnog interesa od strane Skupštine Kantona Sarajevo, kao i uvrštavanje ovog projekta u Program javnih investicija Kantona Sarajevo.

Ukoliko se pravni uslovi stvore u 2026. godini moguće je projekat predvidjeti u okviru programa utroška.

U Budžetu Kantona Sarajevo za 2019. godinu u okviru Ministarstva privrede Kantona Sarajevo, bila su planirana sredstva na ekonomskom kodu 614300 IAN052 - Izrada glavnog projekta za vodovod Crna rijeka u iznosu od 1.000.000,00 KM. U Prijedlogu Budžeta Kantona Sarajevo za 2026. godinu nema te pozicije, kao ni u prethodnim godinama.

Podnosili smo inicijative Ministarstvu privrede Kantona Sarajevo i Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo za ovaj projekt. Od Ministarstva privrede Kantona Sarajevo, nakon 6 mjeseci dobili smo sljedeći odgovor: "Odgovor: Uzimajući u obzir navedenu inicijativu, Ministarstvo privrede Kantona Sarajevo ima načelan stav da podržava sve inicijative koje imaju za cilj poboljšanje usluga javnog vodosnabdijevanja, kao i snabdijevanja električnom energijom građana Kantona Sarajevo. Međutim, potrebno je ukazati na sljedeće. Naime, prema članu 4. tačka 27. Zakona o vodama ("Službene novine Federacije BiH", broj 70/06) javno vodosnabdijevanje podrazumijeva poslove zahvatanja podzemnih ili površinskih voda za snabdijevanje vodom stanovništva, njihovo prečišćavanje do stepena zdravstvene ispravnosti i dovođenja do mjesta potrošnje i raspodjele korisnicima voda. Također, prema odredbama člana 3. stav (1) tačka a), člana 4. stav (1), čl. 10. i 12. Zakona o komunalnim djelatnostima ("Službene novine Kantona Sarajevo", br. 14/16, 43/16, 10/17, 19/17, 20/18 i 22/19) javno vodosnabdijevanje jeste jedna od komunalnih djelatnosti, a komunalne djelatnosti se obavljaju putem javnog preduzeća komunalnih djelatnosti odnosno privrednog društva kojem je dodjeljena koncesija u skladu sa odredbama Zakona o koncesijama ("Službene novine Kantona Sarajevo", br. 27/11, 33/12 - odluka US, 15/13 i 1/22). S tim u vezi, javno vodosnabdijevanje u nadležnosti je KJKP

“Vodovod i kanalizacija” d.o.o. Sarajevo, dok je s druge strane pitanje proizvodnje električne energije regulirano Zakonom o električnoj energiji Federacije BiH (“Službene novine Federacije BiH”, broj 60/23), **te ni jedno od navedenog prema važećim propisima nije u nadležnosti ovog Ministarstva.”**

2019. godine je vjerovatno bilo u nadležnosti Ministarstva Privrede Kantona Sarajevo ali sada nije, te smo zbog toga podnijeli inicijativu Ministarstvu komunalne privrede, infrastrukture, prostornog uređenja, građenja i zaštite okoliša Kantona Sarajevo za ovaj projekt.

Veoma je veliki značaj Projekta “Višenamjenski vodoprivredni podsistem Crna Rijeka” za koji su razgovori aktuelizirani već sada davne 2018. godine. Projekat koji bi dugoročno riješio problem vodosnabdijevanja Sarajeva, a za projektnu dokumentaciju davno započetog projekta "Višenamjenski vodoprivredni podsistem Crna rijeka”, bilo bi potrebno pristupiti pripremi neophodne dokumentacije kao i određivanju vremenskog okvira za realizaciju projektnih aktivnosti, koji bi sistemu vodosnabdijevanja svih općina u Kantonu Sarajevo i osigurao brojne prednosti, odnosno oko 5.000 l/sec vode, proizvodnju električne energije, zaštitu od poplava Sarajevskog polja, razvoj turizma i drugih pogodnosti koje daje ovaj Višenamjenski vodoprivredni podsistem Crna rijeka.

Budžetom 2019. godine bila su planirana sredstva od oko 1 milion KM za početak izrade projektne dokumentacije i plana aktivnosti za realizaciju ovog projekta, ali nikada do danas nisu poduzete nikakve aktivnosti da bi se barem započela priprema za realizaciju ovako značajnog projekta.

Projekat predviđa gradnju akumulacije koja bi obuhvatila oko 224 hektara na lokalitetu Delijaši, Crna Rijeka, kao i gradnju brane visine 90 metara. Voda iz akumulacije bi se cjevovodima spuštala prema gradu Sarajevo do rezervoara gdje bi se vršilo njeno filtriranje i priprema za upotrebu u domaćinstvima.

Ovakav jedan sistem bi obezbjeđivao dugoročno potrebnu količinu vode za cijelo područje Kantona Sarajevo. Danas imamo situaciju da bi trebalo da bude snabdijevano sa oko 3.000 litara vode u sekundi, ali ljeti te količine vode spadnu i na 1.600 litara u sekundi, zbog čega se dešavaju česte redukcije. Ovim sistemom, posebno kada su sušni periodi, iz akumulacije bi se obezbijedilo 5.000 litara vode u sekundi što je dovoljno za normalno vodosnabdijevanje cijelog grada.

Realno postoji mogućnost da Skupština Kantona Sarajevo proglasi javni interes za realizaciju ovog projekta, što bi značajno moglo skratiti procedure koje se tiču planiranja, projektovanja, kao i izdavanja dozvola za gradnju.

Naime, svjedoci smo velikih nedostataka vode u vodovodnoj mreži u Kantonu Sarajevo, barem na ovom području koji opslužuje i servisira KJKP Vodovod i Kanalizacija Sarajevo. Ovo komunalno preduzeće također velike probleme ima sa gubitkom vode u cijeloj vodovodnoj mreži, a svjedoci smo tokom ljeta zbog suša i manjka akumuliranih zaliha vode, zbog čega su građani prinuđeni na česte redukcije vode. Zbog toga što se broj stanovnika iz godine u godinu povećava, gradnjom novih stambenih kolektivnih jedinica i zbog toga što imamo gubitke vode u mreži što dovodi do čestih isključenja i redukcija smatram da je ovo jedan od najznačajnijih projekata u budućnosti Kantona Sarajevo, odnosno područja na kojem vodoopskrbu pruža KJKP Vodovod i Kanalizacija Sarajevo. Ne možemo planirati razvoj Kantona u bilo kojem smislu, ako nemamo razvijenu osnovnu infrastrukturu za pružanje osnovnih životnih usluga građanima Kantona Sarajevo. Zbog područja koje se nalazi u Kantonu Sarajevo koje ima sve preduslove za kompletnu gradnju Projekta "Višenamjenski vodoprivredni podsistem Crna rijeka" gdje Skupština Kantona Sarajevo i resorna ministarstva imaju isključivu nadležnost na ovom području, stoga bi bilo potrebno planirati sve aktivnosti na istraživanju, projektovanju i realizaciji kompletnog projekta na području Kantona Sarajevo. Obilno bogatstvo vodom koje imamo kao privredni resurs i koje nam daje komparativne prednosti i dovoljno razloga da nikada stanovništvo Kantona Sarajevo ne dovedemo u situaciju da nemaju vode ili da imaju svakodnevne redukcije vode.

Pored snabdijevanja vodom za piće, ovo je idealna prilika za proizvodnju električne energije gdje bi nas proizvedeni kapacitet električne energije doveo u potpunu neovisnost o svim vanjskim uticajima.

Obzirom da Vlada i Skupština Kantona Sarajevo nisu prihvatili moj amandman na Prijedlog Budžeta za 2026. godinu, podnosim ovu inicijativu i tražim odgovor u najkraćem mogućem roku, kako bi se ovaj prijedlog uputio Skupštini Kantona Sarajevo na izjašnjenje.

Sarajevo, 29.12.2025. godine

Admela Hodžić